

Malaysia dan Qatar setuju saling iktiraf sijil vaksinasi - PM

Mac 29, 2022 @ 9:44pm



Perdana Menteri Datuk Seri Ismail Sabri Yaakob diiringi Amir Qatar Sheikh Tamim bin Hamad Al Thani (kiri) ketika membuat pemeriksaan kawalan kehormat Pengawal Istiadat sempena lawatan rasmi tiga hari ke Qatar di pekarangan Amiri Diwan hari ini.--BERNAMA

DOHA: Malaysia dan Qatar secara rasmi bersetuju untuk saling mengiktiraf sijil vaksinasi COVID-19 sesama kedua-dua negara dalam usaha pemulihan pasca pandemik virus itu.

Perdana Menteri, Datuk Seri Ismail Sabri Yaakob, berkata kedua-dua negara juga bersetuju mengintegrasikan aplikasi MySejahtera (Malaysia) dan Ehteraz (Qatar).

"Saya akan meminta Kementerian Kesihatan Malaysia dan Kementerian Sains, Teknologi dan Inovasi untuk mengambil tindakan susulan berhubung dengan pengiktirafan sijil vaksinasi dan integrasi aplikasi MySejahtera dan Ehteraz Qatar," katanya.

Ismail Sabri berkata demikian pada sidang akhbar dengan media Malaysia pada akhir lawatan rasmi tiga harinya ke Qatar, hari ini.

Beliau berkata, persetujuan itu dicapai pada pertemuannya dengan Amir Qatar Sheikh Tamim bin Hamad Al Thani selepas majlis sambutan rasmi di Amiri Diwan, pagi tadi.

Ismail Sabri berkata, beliau turut berterima kasih kepada Qatar yang telah memberikan kemudahan vaksinasi percuma kepada lebih 4,500 rakyat Malaysia yang bermastautin di Qatar, sebagaimana vaksinasi percuma yang diberikan kepada rakyat Qatar di Malaysia.

Katanya, mekanisme kerjasama dua hala ini pastinya memudahkan perjalanan pengembara antara kedua-dua negara.

"Bermula 1 April apabila pintu sempadan negara dibuka, Malaysia pastinya mengalu-alukan pelancong dari Qatar," katanya.

Sementara itu, Perdana Menteri berkata beliau dan Amir Qatar telah turut bertukar-tukar pandangan mengenai isu hubungan Malaysia dan Qatar yang terjalin selama 48 tahun sejak 1974.

"Dalam usaha memperkukuhkan lagi hubungan dua hala antara kedua-dua negara, kami bersetuju untuk meningkatkan pertukaran lawatan peringkat tertinggi antara Malaysia dan Qatar.

Di kesempatan ini, saya telah mengundang Sheikh Tamim untuk mengadakan lawatan ke Malaysia," katanya.

Ismail Sabri tiba di Doha pada Sabtu. Ini adalah lawatan julung kali Ismail Sabri ke Qatar selepas mengangkat sumpah sebagai Perdana Menteri Kesembilan pada Ogos tahun lalu. – BERNAMA